

## I Giovani innamorati.

## CANZONE LIII.

Guardè un poch, s' i veule rie,  
 Cousti giovo anamorà,  
 S' a na fan d' bagianarie,  
 Dle materie e folairà;  
 S' a na fan d' bagianarie,  
 Dle materie e folairà.  
 A comenso fè la ronda,  
 E virand antorn a j' us,  
 Dont a j' è quaich bruna o bionda,  
 Com' j' avie antorn al bus.  
 Intrà drinta, che inchinade  
 E d' sirimoniai ch' a fan,  
 O pi prest d' arlichinade  
 Con so brav capel an man!  
 Peui dan dl' eui a coula fia,  
 E sij van astè d' apres,  
 Comensand con soa babia  
 A contene un diaschne e mes.  
 Ai na pianto dle balète,  
 Ai na dan dij bombonat,  
 Ai na fan dle catlinète  
 Pr tireje al trabiciat!  
 Anciodà ch' a l' an la broca,  
 E ch' a s' vedo i bin vnù.  
 Van pr vent, pr pieuva e fioca  
 Sempre a feje servitù.  
 L' an peui tant loli ant la testa,  
 Ch' a van squasi fora d' lor,  
 A san gnanch quand a l' è festa,  
 D' votè j' elo, o di d' lavor.

J' un ai fan fè quaich sernada  
 Pr podeisse angrassianè;  
 Elo pa una bagianada  
 A sgairè cosi i so dnè?  
 Vaire vote stan a vaitela  
 S' a va an Gesia o s' a va a spas,  
 Pr podeje salutela,  
 E ciapela sot al bras.  
 Quand a peulo acompagnela  
 A quaich bal o quaich festin,  
 Stan con j' eui a la padela,  
 Sempre atacà a coul coutin.  
 Ai n' è d' atri ch' andario  
 Angagè j' orie e i dent,  
 Pr pagheje d' ragosio,  
 E porteje dij present.  
 Gara a chi tenteis d' manere  
 Da semneje la porà!  
 Che fracas, che sciapapere!  
 Ai rancrio la corà.  
 Pr sospet e gelosia,  
 Vaire vote s' è vedù  
 Sti sfojor pr coula fia  
 A ranchesse 'l cheur e l' mnù?  
 E sicom' ai va dle greuje  
 Pr podeje fè l' amor,  
 E nen compari pr pleuje,  
 Ma surtisne con onor:  
 A s' angigno d' raspinene  
 O pr rif, o raf ant cà,  
 E s' a peulo nen gratene,  
 A son bei e disperà.  
 An tal cas a fan dij debit,  
 O negossi, o d' carossin,  
 Bin ch' apres a perdo 'l credit,  
 Ai n' importa pa un quattrin.

Gara peui se coula gioja  
 A j' vneis voltè i garat,  
 A fario lor 'l boja  
 Con la rabia del folat.  
 Pr' dè ant l' eui a coula cara,  
 Osserveje a caminè,  
 A la moda pi bisara  
 Tuti consti galinè.  
 O pr Giulia, o pr Gianeta  
 A san pa regnè ant la pel,  
 E 'l so cheur giamai s' achietta,  
 Fin ch' a j' an butà l' anel.  
 A sta gent a j' andaria,  
 Pr guarije 'l mal ch' a l' an,  
 Una brustia, o raspa, o stria,  
 E grateje 'l bufabran.

**Le Donne disgraziate per i cattivi Mariti,  
 ossia mal recapitate.**

#### CANZONE LIV.

**P**ovre done, a van bin compatie  
 Quand ancapito d' oimo lordon!  
 L' an bel fè, bel toirè, l' an bel die,  
 Tant a perdo la penna e 'l savon;  
 O ch' a venta ch' a seufro d' ingiurie.  
 E ch' a tenno la berta ant 'l sach,  
 O cianciand ai faran dè ant le furie,  
 Tant da fesse butè j' os a bsac.  
 Ai na j' è ch' a l' an la testa scrussia,  
 E ch' a son bei e bon sansosi,  
 A s' anmoco quandbin la famia  
 L' abia poch e ch' a staga a pati,  
 Pur ch' a peusso fè lor gaudineta,